

二
林
居
集

二林居集卷之八

長洲彭紹升允初著

事狀

故中丞朱光祿寺卿加二級沈公事狀

公諱趙元字子大世居江南太倉州高祖諱文明封儒林郎曾祖諱衍應父諱受宏鄉貢生通經術隱居教授著書數萬言歿祀鄉賢祠兩世皆贈奉政大夫公童時能文章年十八慨然有自立之志爲諸生敦厲廉恥嚴義利之辨居母吳孺人喪依古禮不御酒肉不內寢其後父喪亦如之康熙五十九年舉于鄉明年成進士補庶吉士以父病乞歸父歿服除入京雍正四年改授驗封司員外郎尋兼考功司明年

命往福建以知府用。總督高文良委署福州府。移興化時。世宗聞閩中倉穀多虧。遣四大臣率謁選府縣官六十餘人。往按有司被劾者十居五。餘悉解任。聽勘受事者較計升合。爭爲煩苛。公獨持平。宏大體。興化屬僊游。令受代。不肖收碎米。公怒曰。穀以備賑。碎米獨不可食邪。令謝過乃已。糧道李玉銍聞而歎曰。近日閩省。惟建寧興化爲光天化日矣。建寧守姜君亦良吏。其屬官多賴以得全者也。莆田有黃陳兩家。連歲訟不洩。乃結黨互毆。有南北黨之目。上官恐其釀亂。將悉捕治之。公責兩人而釋其餘。報曰。釁由主者。懲之畢矣。餘不足問也。

詔以閩人不善官。旨令督撫教之學習。興化土音尤詰屈。讀

書了不可辨。公建正音書院。擇閩人通官音者爲之師。集諸生以四聲教。正經書。俾轉相教授。上官采其法。頒行諸府。在官禁屬官饋獻。府倉壞。出私錢興造。一不以擾民。巡撫常安。委攝海關司。關向無養廉。責諸關口差役。歲輸金三千以給。公請于巡撫革之。並並洋船規例數千金。巡撫有家奴守關。欲浮收糖稅。不得格二十餘船。不行。公聞立督收稅如額。放船行。而白其事于巡撫。巡撫召家奴切數之。由是人莫敢不奉法。及常去。代者朱定元向公問常奴贓狀。公不對。朱彊之曰。起元但知常公任內革除浮稅四千金。它非所知也。初高文良奏開南洋。

報可。已復禁內地商久畱外國。文良下令出洋者必咸里具。

結狀立往還期限逾者連坐公進曰此法立將一船不得行
文良問故曰出洋者生死疾病無常數貨物利鈍無常期此
豈內地盛里所能逆料而爲之具狀乎且公不聽開洋則已
今聽之商人造船集貨費無算忽以結狀燒之是明利之而
陰奪之也商何望焉文良曰君意云何曰但令商自具狀過
三年不歸者不聽回籍以此牒部足矣文良喜令商具狀如
式部例洋船水手多寡視梁頭大小商苦納稅大輒報小及
出口船不得行泉防同知馳啟督撫議增水手公方奉檄放
船商環集求驗放且請聯舟互濟免增水手同知欲候督撫
令下不可公夜詣同知曰水手定額工部所頒督撫不能增
文移往復轉展駁詰商船且不得行南風將起彼情急必生

變。君其危哉。同知不得已。許諾則眾已洶洶集。同知門矣。初兩院得同知啟。方愕眙。不能爲計。及聞船已放。則大喜。守興化三載。史文靖公奉使至閩。以牧守優等。第一薦。攝臺灣知府。臺田一甲準十一畝。有奇。賦有上中下則。上則一甲收穀八石。中則六石。下則四石。視內地加數倍。然率多隱占。民不甚困。時丈量法行。占者不得匿。公將赴臺。文良語之曰。吾欲使臺田悉視同安。下則起賦。但恐不及。故額致部駁。奈何。公曰。此事籌之素矣。宜令著籍田。且仍舊額。而丈出者視同安起科。俟隱占既清。更減舊額重者。均于新額之上。則賦不虧。而民不病。文良以爲然。及至臺。大風壞海船廬舍。人民率漂溺。公單騎案視。賑給流民多所全活。時有山豬毛社生番之

擾議設寨山口。斲其出入南路。遂寧新守至。還興化。先是國安縣民有冤獄。按察使潘體豐不能察。獄成。總督命公覆訊。直其冤。潘坐是銜之中。以它事。部議降四級用。遂如京師。尋告歸。高文良總督兩江。聘主鍾山書院。今

上卽位。召入京。授江西驛鹽道。在官絕商人餽遺。臨行以千金爲贖。卻之。乾隆二年。授河南按察使。夏大雨災。被四十六縣飢民四走。布政使欲闢之。公曰。民飢且死。奈何。禁其它徙。昔田文鏡以此獲咎。可鑒也。今邊境州縣有未被水者。宐安插流民。給口糧。俾毋出境。其可從之。屬吏報鹽梟四十餘。拒捕傷人。已而獲者過半。法皆當斬。訊之。自四五人外。皆飢民。請于巡撫雅爾圖。斬三人。戍二人。餘杖遣而已。巡撫令府州

各設書院。屬公總其事。公以敎士當先實行。頒鄉先輩陳確庵敬怠日程。自大梁書院始。進諸生。示以省身克己之學。嚴其程。而加差等焉。巡撫立章善坊。令諸州縣舉孝子悌弟義夫貞婦。登其名。公采訪事實。著章善錄板行。一時風動。有兄弟爭訟累年。忽大悔。讓財產。友愛終身。七年。遷直隸布政使。明年大旱。七月。總督高斌自江南視河工還。公迎謁固城。議賑事。高欲遲至仲冬。公曰。飢民朝不謀夕。豈能久待。請先普賑一月。再查戶口。分別加賑。高慍曰。必如此。君自奏之。公出語清河道方觀承曰。普賑萬不可緩。時之安危。民之生死。在此洩矣。子其圖之。方入言于總督。卒從公。請時有縣令倡言賑戶不賑口。公怒曰。一戶數口。止賑一二。是且殺七八人矣。

移檄州縣有犯此者舉之戶部尚書海望奏清理直隸旗地
有司違限奉

旨飭責高恐命公劾數州縣以應

命公不可曰旗地非旦夕可清州縣方焚何暇了此獨効起
元可也乃止九年內轉光祿卿尋奉

命稽察宗學居間讀易折中古訓著周易孔義十三年移疾
歸歷主濟南揚州太倉諸書院晚而杜門日誦先儒書病中
手鈔明道先生語錄臨終語其友曰平生學力無住手處年
來日夕檢點身心仰不愧俯不忤或庶幾焉卒年七十九所
著書自易義外有敬亭詩文集十餘卷刻行于世

敬亭文集
沈祖望所

述
撰行

故通奉大夫都察院左副都御史雷公事狀

公諱鉉字貫一先世由豫章遷汀州之寧化曾祖諱某祖諱某父諱某縣學生三世俱贈通政使司通政使公年十七補諸生時漳浦蔡文勤公講學鰲峯公讀其學約悅之從文勤游慨然以聖學自任慕陸清獻公之爲人也旣通籍勤學不懈肆其所蓄施于有政氣淳而守固遇義所不可必達其意初舉鄉試至京時蔡公在朝次學士朱文端公欲見公公不往文端乃就蔡公館與公論易器之雍正八年以合河孫文定公薦授國子監學正十一年成進士選庶吉士明年以大父母春秋高請急歸省

上卽位召至京授翰林院編修直上書房屢轉至左諭德兼

二九
修撰每進經史講義必明辨安危治亂之幾歸本于人主之一心以推極于民生國計反覆詳盡無隱情會同官余棟以喪歸未葬入臨

皇子喪

上欲畱之公奏曰侍學之臣所貴明大義篤倫理非徒取記誦詞章而已今余棟父喪未葬遽直內廷設講書至宰我問三年喪章何以出口乎聞輔臣以其辭爲好名使人入避好名之嫌不求盡人子之道非細故也事遂寢繼以太公憂去官服除召還旋擢通政使乾隆十一年三月日食求言公上書曰伏讀

上諭戒飭臺諫諸臣處心積慮不外名利二涂此

皇上裁成激厲望此諸臣盡以古純臣爲法也夫就臣子而論不可計利并不可好名計利者卑瑣不待言稍存好名之念必不能勉竭忠愛曲盡事情而在朝廷樂聞讜言但當論其言之是非不必疑其計利并不必疑其好名果其言爲上爲德爲下爲民

皇上采而納之天下後世傳而誦之正足見

聖朝之有人臺諫之所得者名政事之所資者實也昔孔子稱舜之大知曰隱惡而揚善當舜之時進言者亦不皆有善而無惡唯舜隱之揚之所以嘉言罔攸伏明目達聰成執兩用中之至治

皇上誠切求言臣不自揣量鯁鯁過計者如此若夫信任忠

良練達之臣。屏絕諂諛容悅之習。不爲無事之游。幸以增煩費。不耽無益之玩好。以妨幾務。此我

皇上日夕乾惕。時存警戒。無待臣下之敷陳者也。疏入。

上訓勉宣示焉。十二年冬。

詔以明年春巡山東。將次及江淮。吳越公因傅述。

聖祖皇帝巡方故事。勸。

上飭諸大吏。省徭役。敦樸素。以優民。

上亦已有。

旨諭諸臣矣。以公言忠弗過也。十四年夏。以太夫人疾。乞假歸。逾年入朝。

命提督浙江學政。俾迎養太夫人于官。十六年秋。移任江蘇。

明年以左副都御史復任浙江公之教士也提倡正學以程朱爲的其所至必訪求高行卓識之士以禮先之竝徵先哲遺書擇其善者而裒著之由是人知向方奮發者眾時有司有勒屬誣報劣生者公疏糾之因言舉報優劣宜責成府縣官定以處分又言貢士太學宜先老成通經學者二十年秋浙西被蟲災巡撫周人驥謂已屆秋穫不以聞公致書規之不聽遂具章入告得

旨賑卹而治巡撫臬明年夏以太夫人年八十預請復命時乞

恩歸養

上命卽自浙江侍母歸二十二年

南巡

御書四言額爲太夫人壽。又二年太夫人卒。未終喪而公亦卒。年六十四。時乾隆二十五年十月也。公嘗學文于望谿方先生。所著經筵堂集。具有家法。平生多布衣交。在京善李鏊。朱燾。在蘇善陳黃中。晚而在家。與建寧朱仕琇論文尤密。遇後生晚學。一材一藝。有過人者。必委曲成就之。瑞金羅有高。嘗游學公門。服公之教。未嘗去口。紹升與有高交。慕公之德。望久矣。因詮次其略爲之狀。雷定淳所撰行述

朱梅崖集唐報

書諸名公事狀後二則

事狀之作。將以上太常史館爲易名記注之本。大都出自門生故吏。如韓退之之狀。董李習之之狀。韓是也。然習之論百

官行狀莫不虛加仁義禮智。妄言忠肅惠和。處心不實。苟欲虛美于所受恩之地。然則當日之文求得如韓李者亦已鮮矣。至唐書藝文志載李氏海內先賢行狀。朱晦翁書濂谿先生事實。則生不同時。居不同地。其所論述。一出于秉彝之公好。初非有私昵于其閒。如習之所譏。誠不足慮于于。

本朝諸名公讀其書。攷其行事。輒私心向往。第尋覽往時記載之文。或略不具本末。或煩蕪而寡體要。心嘗病焉。揆索餘閒。竊取李氏朱氏之意。成事狀十六篇。庶幾習之所謂指事書實。不飾虛言者。傳之異時。徵故獻者。當有取焉。

文獻不足。雖善無徵。予之狀諸公也。徵諸文者。則有奏議書牘策論之篇。皆當日施于朝廷達于倫物者。不可以僞爲也。

徵諸獻者。則有諸公朋舊門生子姓之屬。其所撰碑志行述。聞見旣鑿。情實難淆。以視夫道路之風聞。稗官之勦說。不旣遠乎。往在京師。得望谿方氏未刻彙書。康熙閒諸公逸事。凡數篇。其敘湯文正陳恪勤得謗之由。及李文貞奏對數事。皆薦紳閒未及聞者。今狀中所采是也。而家仲兄與修。

國史記憶所及。予因得參攷異同。折中一是。雖言之無文。亦庶幾無所苟而已矣。至所引諸書各條其目。略仿朱子伊川年譜之例。自餘諸公亦有名節在天壤。功烈震一世。而其書不傳。其蹟散佚。無可攷。其僅見于八旂直省諸通志者。非博稽金匱石室之藏。未易周知其顛末也。疑者闕之以俟後之君子。

皇清光祿大夫經筵講官兵部尚書致仕先考彭府君事狀
曾祖璫任廣東長寧知縣累贈光祿大夫吏部右侍郎加
一級妣施氏袁氏俱贈一品夫人

祖定求任翰林院侍講累贈光祿大夫吏部右侍郎加一
級妣李氏贈一品夫人

考正乾需次州同知累贈光祿大夫吏部右侍郎加一級
妣周氏封一品太夫人

府君諱啟豐字翰文方舉于鄉之歲芝生庭中故自號曰芝
庭先世自明洪武初由江西清江遷蘇州世居長洲縣十泉
街今分隸元和長寧公初以文學名晚而篤信程朱講學
鄉閭興起者眾至侍講公稟承遺教以道淑身所著書善

發明儒先學脈。殉祀鄉賢祠。同知公韜光不試。修長者行。晚舉鄉飲大賓。蓋彭氏自明中葉而降。以儒學傳家者百數十年入。

本朝而益著。故江以東言門望者多推彭氏。府君生十歲左右。侍講公和詩屬對。輒工敏。侍講公早器之。每戒府君曰。大器晚成。汝當斂華就實。毋輕泄也。年十六。補諸生。十九。侍講公卽世。二十一。娶宋夫人。治舉業。暇好爲詩。從城南詩社。沈稿士徐龍友陸學起諸耆宿。切劘講習。作述懷詩。慨然以復古爲己任。雍正四年。舉鄉試。明年會試。第一。時年二十七矣。殿試卷列第三。世宗親擢第一。授翰林院修撰。旋

命直南書房七年秋充河南鄉試副考官入闈病作移宿于外氣垂絕恍惚見二童子自雲中持采旂導還鄉至文星閣一老人持藥飲之遂蘇文星閣者侍講公異時講學地也反至京

命遣醫診視

賜人蔘服之病良已十一月充日講起居注官九年春方侍直

世宗手書聯語以

賜其年三月試進士出身官卽

命內廷翰林閱卷府君與焉其一府君等三人卷有

旨俱列一等明年秋充雲南鄉試主考官十一年春元會試

同考官十月聞周太夫人疾請假

詔許馳驛歸明年正月還朝十三年二月遷左春坊左中允其年秋充江西鄉試主考官時江西官生止二十九卷例中十卷而文多淺拙因裁去四卷以民卷足之是歲得人偶盛甫出闈聞

世宗晏駕疾馳至京既反

命朱文端公遇于朝揚言曰江西佳士被主司一網收盡矣十月充順天武場鄉試副考官乾隆元年秋充山東鄉試副考官府君自入翰林刻苦如諸生鮮食寡欲畏遠權勢簡交游日以文章自娛泊如也至三年六月上以甘霖溥降

召大學士及內廷翰林泛舟圓明園給筆札賦詩 府君立
成七言律詩四首以進

上褒賞甚至七月遷翰林院侍講賞賚有加八月充順天鄉
試同考官五年六月轉翰林院侍讀十一月遷右春坊右庶
子時

詔許近臣得奏進經史講義 府君前後所上多切于治體
嘗論月令言行齋出禪必當其位夫所以使之當位者有三
焉一曰尊宰輔以崇其體二曰卹羣臣以達其情三曰久任
使以專其職明良之世君不疑其臣臣自不欺其君其左右
大臣必有耆艾碩德從容朝廷之上汲引善類扶植忠良所
當布以腹心隆其禮貌故曰任賢勿貳至小臣者大臣所自

出。宐。優。卹。而。厚。期。之。其。厚。期。之。者。尤。在。作。其。敢。言。之。氣。不。獨。
臺。諫。官。當。責。以。盡。言。卽。翰。林。曹。郎。亦。宐。分。班。條。奏。講。明。經。術。
敷。陳。庶。事。則。耳。目。廣。而。人。才。益。厲。若。夫。人。之。才。器。不。能。相。假。
故。虞。廷。諸。臣。兵。農。禮。樂。各。有。專。司。一。官。終。身。不。易。其。任。儻。甫。
履。其。地。旋。改。而。之。它。叩。以。政。務。必。茫。然。莫。辨。況。民。社。之。官。責。
成。非。細。宐。仿。古。者。增。秩。賜。金。之。制。俾。人。與。官。相。習。庶。明。作。有。
功。之。效。可。得。而。幾。也。又。嘗。論。玉。藻。云。動。則。左。史。書。之。言。則。右。
史。書。之。蓋。人。主。一。言。一。動。卽。安。危。治。忽。之。幾。所。由。判。唐。臣。杜。
正。倫。云。臣。職。當。修。起。居。注。不。敢。不。盡。其。愚。直。若。一。言。乖。于。道。
理。卽。千。載。累。于。聖。德。觀。于。此。者。雖。欲。不。日。愼。一。日。其。得。已。乎。
臣。濫。膺。斯。任。密。邇。德。音。常。願。

聖心始終如一。凡一言一動。務求閑邪存誠。法天行之健。接
執中之傳。恭己無爲。而天下治焉。又嘗因論通鑑。宋雍熙二
年求遺書事。請廣按宋元以來迄

本朝諸儒遺書。切于理道者。進

御傳刊以惠四方之士。有

詔頒示內外。如府君言。六年秋。充江西鄉試副考官。遷翰
林院侍讀學士。十月。遷右通政。再遷左僉都御史。路過宿州。
時方被水。知州許朝棟報災延緩。及造冊發賑。老弱多不得
與。飢民號訴者日數千人。鳳陽知府楊毓健督賑無術。府
君還朝。具奏其事。章下督臣察治之。江西前任學臣諂事大
吏。以屬官門生自居。府君復奏言。學臣職在表率士子。宜

得端方清正之人以厲廉隅興教化。若乃逢迎媚悅曲意徇人長鑽營之習開請託之門相師成風所關非細宜加禁飭俾各遵守儀制下部議行十二月。

命提督浙江學政明年三月至官四月遷通政使其年秋陳學政事宜六條一論生童考試既有經義條對宜將講義刪除一請裁武童入學之額一請嚴甲商濫保商童之律一請復歲貢隨場考試之例一卷面不得填廩增附字樣一請以四等武生充鄉場對讀下部議多見施行十二月遷左副都御史八年春遷內閣學士兼禮部侍郎領學政如故十一月遷刑部右侍郎府君之督學也以潔誠自矢日四鼓蒞堂皇呼唱畢闔門嚴試之罕有繼燭者晝夜校閱未嘗稍怠忽

其論文必經經緯。史發發雲涌。而以寒儉爲大戒。故所錄士不數年間。登鄉會榜者不可枚數也。九年任滿。明年四月還朝。奏言浙江士子文藻有餘。罕知實學。伏讀

欽頒太學訓士文。昭示聖賢爲己之功。至剴切。請刊碑天下學宮。朔望宣講。

報可。又論浙江利病四事。一餘杭南湖之水。發原天目。注茗谿。下灌杭嘉湖三府。今沙土淤塞。侵占者多。西湖之水灌田萬頃。今湖水淺狹。葑茭蔓蔽。其它會稽上虞餘姚慈谿諸縣之湖。僅存其名。難按其實。夫水利不修。則農田不治。請

敕下督撫酌議。次第開濬之法。剷除侵占。疏濬壅塞。務使畜洩咸宜。旱潦有備。一浙省收漕。每石私加五六升至一二斗

不等。宜設法嚴禁。一浙省官水陸往來。其奉使馳驛者。所用夫役。有兵部勘合可稽。而本省官向無定額。多者役及千夫。少亦不下六七百人。騷擾實甚。宜加限制。一溫台諸府席鹵產鹽。多有營兵以搜鹽爲名。按戶追索。或將數家食鹽并少報多。指爲私販。送官邀賞。亦宜嚴禁。章下所司。議令責成。督撫凡諸湖蕩俱飭屬詳勘。量加濬治。其漕鹽驛路諸弊。分別禁治。如所請在刑部八月。閱讞牘。敬慎詳審。有疑輒商。諸僚屬其秋審舉囚。眾論情實者。以府君核別。改緩洩者十數人。十二月間。同知公赴疾馳歸。日行百二十里。明年正月。抵家。十三年春。服闋葬。同知公于虎邱新唐橋時。周太夫人瘡疾閒作。因具摺陳情。請展赴闕之期。

報可。明年八月爲太夫人祝七袞壽。張樂三日。十五年四月始赴京。補吏部右侍郎。直南書房如故。其年秋扈駕至河南。明年五月進見時。

上詢知周太夫人年高。

賜以題曰慈竹春暉。八月再

命提督浙江學政。十月抵杭州。府君以異時所錄文雖如霞如綺而文過其質。要非先進禮樂之遺也。遂兼以清真爲導。藝實之士不相揜焉。案試湖州有諸生挾卷以獻者。巡捕經歷雷開基脅取其金。試山陰副貢汪倫英屢代人入試。俱察出。論奏如律。十七年。

恩科鄉試。府君奏言浙江舉額數不過八千三百有奇。其

中額不過九十四名與江西等而同考官則用十八房比江西獨逾其四定量爲裁減下部議減二房又請清釐商籍官生嚴杜混冒亦下部議行其明年選諸生充貢多一時耆宿象山姜炳璋嘉興李集才最優而貌俱侵已而鄉試俱中式裘公曰修爲主司見之笑謂府君曰子可謂略元黃而取神駿者矣十月調兵部左侍郎十九年正月還朝是歲扈駕由盛京至吉林明年二月乞

恩終養

報可三月抵家二十二年

上南巡府君渡河迎

駕尋送至河干

召見者再先是 府君直內廷及扈從南北

敕和詩動以十百數至是復發詩百六十餘首

命和畢交巡撫奏進明年秋 宋夫人卒 夫人事舅姑篤

謹持家事籌畫有無一不以關 府君慮及是 府君始自

督家政析田八百畝分授四子俾分竈而爨焉又明年八月

爲 太夫人祝八袞壽張樂三日十二月 太夫人舊疾復

發病數日而卒 府君先後居喪旦夕不離殯側斷吟咏絕

游宴終喪始復寢于時日跪幕前誦金剛般若經茹蔬至小

祥不孝紹升檢禮經六十不毀之文以進始少嘗肉味二十

五年十月薨 太夫人于 同知公墓明年冬入京祝

皇太后萬壽

召見以服制將闕

命仍直南書房署吏部右侍郎二十七年四月補吏部左侍郎秋充浙江鄉試主考官十二月遷左都御史入見

諭曰汝資格淡人又誠實故特擢汝但慎毋喜事府君頓

首謝明年六月遷兵部尚書充經筵講官又明年七月扈

駕至木蘭三十年七月奏部中候補參將都司等官不無壅

滯請量予疏通又言奉使官向有馬無夫所用之夫每從驛

遞借雇恐啟額外濫應之漸查定例赴任官夫馬竝給者不

支領給口糧請嗣今奉使官亦遵此例其借雇者通行禁止

章下所司議候補參將至五名以上卽予分發其奉使官需

用夫者每馬一匹折夫三名時大學士陳文恭公請裁官生

卷并入民卷議未定

上召問府君。府君對曰。官卷中額。屢加汰損。卽今定制。不爲過優。若裁歸民卷。轉無限制。亦非所以爲坊也。事遂寢。八月。充順天鄉試主考官。府君在朝。和平正直。表裏一如。不爲激切之言。亦不肖詭隨。眾好經筵進講。數傳述堯舜孔孟心法。以翊輔聖德。其論事必度時勢所宜。不苟爲高論。故先後所上奏。施行者十居八九。當再起吏部時。遇京察。奉

旨。密弟屬官高下。有郎官阿蔽爾圖者。方向用它長官以一等上。府君獨弟以二等

上。以爲有心示異。下

二才月集 卷一
旨訓飭及掌兵部時與同官奏免滿州世職積逋銀萬餘兩事既行已而

上以世職中有不應免者責諸臣不分別奏請令代償所免府君與焉

上嘗詔示中外謂彭啟豐學問尚優而短于辦事唯府君亦自以爲不足也三十一年冬部中蔣史兩侍郎有隙蔣訐史于

上前且謂史于眾中詆府君

上召問府君府君以弗聞對復奉

旨飭責罷史歸而降府君右侍郎三十三年京察以原品致仕九月抵家三十四年四月別建祠堂于家之東偏爲四

龕祀 同知公以下其年冬總督高公晉攝巡撫事延府
君主紫陽書院明年秋入京祝

萬壽又明年冬再入京祝

皇太后萬壽

詔與香山九老會繪圖

賜杖禮成而歸三十八年

詔訪求遺書大吏開局紫陽書院請 府君總之歲周而畢
得書千八百部奏進

御覽四十一年春

駕巡山東 府君迎至泰安

召見慰問良久

詔復尚書銜

賜宴閱

召試諸生卷明年正月聞

皇太后升遐赴京旋反四十五年春

上南巡府君迎至龍泉莊其年秋赴京祝

萬壽至濟寧得疾歸府君家居無博弈之娛無聲色之好以儉約率先鄉里遇生辰戒子孫不得張樂客至者薄酒數巡而已是年屆八袞亦如之四十九年春

上復南巡府君再至龍泉莊

上慰問畢

諭曰汝精力尚彊當以今冬至京與來年千叟之宴府君

謹受

命既歸家忽得頭暈病逃悶者再至六月中旬患隔日瘧及望稍瘥十六日晨起至外寢倚榻臥不孝紹升侍扶起坐忽氣逆上倒身就枕遂逝遺疏達熱河

行在時尚書曹公秀先亦卒于位

上謂廷臣曰彭啟豐曹秀先俱不得與千叟宴也惜哉府君平生天真自然不知人世有機械事坦懷接物徹去畦町意有不可或時面折人然過已輒忘無少藏積以故賢士大夫多樂與府君親在翰林時鄂文端公掌院事知府君尤淡每侮之

上前它掌院或相排擠文端每曲解之其在同列諸城劉文

正公與今大學士樞公與府君交久益篤相對無隱情

府君會試出尹文端公之房文端總督兩江從府君咨訪

時事每見采納明光祿卿徐公如珂賜瑩爲土豪程氏所侵奪許訟累年不洩文端以府君言下所屬反徐侵地而治

程之舉里人陳君黃中高才有節操以蜚語陷下縣獄亦以

府君言得釋然府君素不樂與人事至晚益務簡靜其太

吏雖門生姻戚歲時酬酢外未嘗有私謁也初從侍講公受

讀先儒書中年以還流覽諷誦向往彌切晚更旁參竺乘曰

有程課嘗語人曰吾爲秀才過徐達夫門時其及第方立斗

豔之及吾宦成歸再過之而徐氏已易主矣後之視吾

之視徐也如此得不誦金剛經乎爲詩文操紙筆立就

既成必使人盡意技別俾無憾乃已少壯時爲詩頗尚聲采後漸造平澹然元氣渾然到老不竭所刻古文既出邵武朱君仕琇頰首歎服曰規矩天成不煩繩削當今公卿閒未見其比建昌魯君仕驥尤盛稱府君碑版文以爲虞伯生後一人而已課諸生令各奏所長不名一體零章斷句閒遇愜心欣賞彌日雖其子子弟也亦然此可以見府君之量矣府君生于康熙四十年卒年八十四先授承德郎左春坊左中允累授光祿大夫吏部右侍郎加一級娶宋夫人累封一品夫人子男子六人紹謙舉人官曹州府同知先卒紹觀進士官翰林院侍讀學士紹咸增貢生先卒紹升進士需次知縣紹節殤紹濟孫男子十二人希韓舉人議敘知縣希范

舉人廣東合浦知縣希濂進士刑部額外主事希洛舉人祝
莖監生希涑廩生呼嵩監生天希鄭附生希曾希彥希萊希
仲曾孫六人蘊琨廩生蘊琪蘊芬蘊采蘊輝蘊璨烏呼不孝
紹升生較晚當府君壯歲服官時不孝蒙穉未有知識自
成童之歲侍府君于家府君親授以朱子近思錄爲講
說其文私心悚然發進取之志其後府君在

朝不孝省覲者三因以得交四方豪俊相與淬厲行業治古
文府君顧而樂之自歸田以還承命校刊文集讀府君
往時奏進文字始具曉府君立朝本末其于身心切近之
地咨稟得失益加詳焉上天降割遭此閔凶創痛方深何心
記撰雖然傳亦有之有善而弗知不明也知而弗傳不仁也

爰薈萃見聞，麤成章段。會仲兄紹觀自京奔歸，別構府君行述，甚具。但文句繇富，恐閱者不能徧周，謹刪取大略，亦頗有增加，以備史志采錄。要不敢緣飾美懿，誣府君謙牧之素冀。知言君子有以諒其志焉。不孝孤紹升謹狀。

門下士王芑孫填諱

十七日止非

二林居集卷十八

終

三林居集卷十九

長洲彭紹升允初著

述

儒行述

儒之道明三綱五常經緯萬事。飭其叢淆。使罔不順理。洋洋乎天地之際。逮後稍陵遲。求言議之工。務實者。魁門戶。分是非。起儒益難言矣。子言之。女爲君子儒。無爲小人儒。噫。可不慎哉。作儒行述。

沈求如。名國樸。浙江餘姚諸生也。早歲棄舉業。以明道爲己任。嘗入嵯見周海門。論學有省。旣與戢山劉子會講。證人社歸。而關姚江書院與管霞標史子虛史子復講明良知之學。

崇禎末屏居石浪明亾聞劉子不食歿哭之慟已而令門人重修書院講學益勤我

朝順治十三年卒于石浪年八十二初山陰祁忠敏與求如善忠敏以御史按江東一日杖殺巨慙數人曾求如至欣然以告求如字祁曰世培亦曾聞曾子云如得其情則哀矜而勿喜乎忠敏後嘗語人吾每慮囚必念求如恐倉卒喜怒過差負此友也霞標名宗聖餘姚人爲人孝友忠亮彊氣自克一言一動必準于禮鄉人多化之少保孫鑛始與霞標爲文字交旣從霞標聞聖學語霞標曰向嗜讀左國秦漢百家書先生爲我洗盡矣祁忠敏薦于朝詔徵不起崇禎十四年卒年六十四子虛名孝咸亦餘姚人宋太傅浩之後也求如卒

繼主姚江書院。嘗曰：良知非致不真。又曰：空談易對境難居。處恭執事敬，與人忠，精察力行之。其庶乎家貧日食一粥，泊如也。由是醇潔之士多歸之。然子虛之學以悟爲則，時崑山葛瑞五參學有得，通書子虛子虛復之曰：人生唯此一事足下。旣于此地，有省良可慶幸。淡望百尺竿頭，再圖進步。否則滿絲一縷，亦能絆人也。順治十六年卒。年七十八。弟子復名孝復，志行淵密，和而有守。崇禎十七年卒。求如有弟子王金如者，名朝式，山陰人。嘗與劉子證人社。劉主誠意，而金如篤守致知。曰：學不從良知入，必有誠非所誠之蔽。由是會者往往持異同。凡從劉學者，多以禪排沈氏。唯劉子亦不釋然也。嘗致書金如，其略曰：僕生也晚，不及事前輩老師大儒，幸私

淑諸人于吾鄉得陶先生學有淵原充養自得每與講席積
痼頓開退而惘然失所懷也其它若求如之斬截霞標之篤
實子虛之明悞皆僕自忖以爲不可及者不問其爲儒與禪
也至足下志願之大骨力之堅至之以不止成就正未可量
亦不暇遽問其爲儒與禪也然而世人悠悠不能無疑曰諸
君子言禪言行禪行律禪律何以道學爲諸君子自信愈堅
世人之疑之愈益甚今將永拒人于流俗不得一聞聖人之
道是亦諸君子之過也傳有之中道而立能者從之又曰魯
人獵較孔子亦獵較諸君子而誠畏天命憫人窮有溥濟一
世之願盡一世之人納之大道闢陽明之室接孔孟之傳則
心迹去就之際空必有以自處矣若止就一身衡量諸君子

既已自信矣。亦安往而不可乎。然僕有以知足下之必爲彼而不爲此也。陶先生者。名夔齡。與劉子講學陽明祠。其學亦出入儒釋間云。崇禎十年。浙中饑。金如入。賑粟所活甚衆。與同門蘇禺民鄭奠維並爲求如立書院置田以來學者。見流賊方熾。將走四方。求奇傑謀時難。無何疾卒。年三十八。自沈史既沒。書院輟講者。竟十年。而縣人韓仁父繼之。仁父名孔。當亦求如弟子。爲學兼綜諸儒。以名教經世。兢兢儒佛之辨。居貧未嘗向人假貸。每言立身須自節用。始出陸梭山居家制用篇授學者曰。能倣此亦自足用。何更外求爲。臨講必默對良久。始發語。聞者輒內愧沾汗。退而相語曰。比從韓先生來。不覺自失。疾亟。謂門人曰。吾于文成宗旨。覺有新得。簡

點形迹終無受用。識之時又有邵子唯者。名曾可。爲人孝友。愷悌。少頗愛書畫。一日讀孟子曰。伯夷聖之清者也。遂渙然釋去。姚江書院初立。里人多以爲笑。子唯厲色曰。不如是。便虛度此生。遂往。同儕請業者。競相質難。子唯獨默然。竟日。初以主敬爲學。後專提致知。嘗曰。吾乃今知知之不可以已。日月有明。容光必照。不爾。日用跬步。鮮不買買矣。師事子虛甚謹。晨走十餘里。叩牀下省疾。不食而反。如是月餘。亦病。同儕推其篤實。順治十六年卒。年五十一。韓邵旣歿。姚江學者曰。衰矣。

思復堂文集居易齋文集
戴山先生集紹興府志

孫啟泰。名奇逢。直隸容城人。明萬歷中舉人也。少倜儻好奇。節天啟中。東林黨禍方作。會孫承宗以大學士經略薊遼。啟

泰上書承宗。令解黨禍。承宗請入見。不許。已而欲疏薦之。啟泰弗應。時畿內多盜。乃移家入五公山。門生親故從而相保者數百家。設教條。肅部伍。爲守禦之備。暇則講習詩書。修冠昏喪祭之禮。恩教旣行。盜莫敢犯。順治中。祭酒薛所蘊。兵部侍郎劉餘祐。巡按御史柳寅東。陳蜚交。章論薦。

朝命敦促。固辭弗應。旣而渡河。率子弟躬耕蘇門百泉山。老焉。初啟泰與定興鹿伯順交。始自奮于學。博觀約取。尤篤信陽明王子之書。病世之名。朱陸者。樹門戶。競辯說。不知反本。乃著理學宗傳。以周程張邵朱陸。辟王羅念庵。顧涇陽。十一子爲宗。自漢董申以降。迄明季諸儒。其謹守繩尺者。次之。橫浦慈湖諸儒。論議有出入者。又次之。其言曰。譬之歲功。孔子

備四時之令邪。諸大儒各具春夏秋冬之一令邪。次之二十四氣邪。再次之七十二候邪。合之成歲功。其學專務躬行歸本慎獨。自言年七十以往。每益十年而功加密。唯獨知之地不敢自欺。無或懈而已。每晨起謁先祠畢。退居一室。澂心端坐。疾病未嘗有惰容。子弟進止皆中法度。閨門內外肅如也。四方來學者。無賢愚。開以性之所近。與人無町畦。武夫悍卒。工商收豎。接必以誠。故天下識與不識。莫不聞其風而慕之。康熙十五年。年九十二而卒。睢州湯斌中歲游啟泰之門。其生平論學。一守師說云。湯子遺書理學宗傳望谿文鈔刁蒙吉名。包直隸祁州人。明天啟中舉鄉試。再試禮部不售。遂謝公車。鍵關讀書。一意聖賢之學。嘗曰。吾日三省吾身心。

無妄念乎。言無妄發乎。事無妄爲乎。居常恂恂然。見義輒奮。發流賊掠畿西。至祁。蒙古散家財。糾眾千餘守。且戰。城得不破。時有二璫督兵事。有揆卒報賊勢張甚。二璫怒。謂其惑眾。欲斬之。蒙古厲聲爭之曰。必欲殺彼。請先殺刁包。二璫氣索而止。已而相語曰。使若居官者。其不爲楊左乎。賊退。流民載路。設屋數區養之。有疾傷者。予之藥。山東婦女被難者七十餘人。不能歸。蒙古命其僕六人護而歸之。于其行。爲六人者八拜。六人者皆感泣。歷六府。盡歸諸其家。愍帝崩。設主服。衰服朝夕哭。已而被僞命。趣之起。七發書拒之。幾及禍。曾闖敗。乃免。初。聞容城孫啟泰講良知之學。心向之。旣讀梁谿高子遺書。大喜曰。不讀此書。幾虛過一生。遂爲主奉之。自檢。或有

先生

東林書院志

過差或工夫稍懈卽詣主前長跪自訟每晨起誦易一周輒垂簾靜坐以爲常居父喪哀毀月餘鬚髮盡白三年不飲酒食肉不內寢及母卒號慟嘔血數升遂病不數月而卒將卒時肅衣冠起坐命子濂告辭先人及高子主問以生產不荅徐曰吾胷中無一事行矣遂逝年六十七學者私謚曰文孝

李中孚名 陝西盩厔人父信吾名可從義烈士崇禎末應募從軍隸監紀孫兆祿從陝西總督汪喬年討賊喬年戰歿襄城兆祿與信吾等五千餘人竝歿之中孚年十六而孤母彭氏教之讀書家貧常從人借書比長博涉經史攷正訛謬著書數十卷已而盡棄之反身密踐期于自得其論學以博

過。自。新。爲。始。基。靜。坐。觀。心。爲。入。手。以。謂。必。靜。坐。乃。能。知。過。知。過。乃。能。悔。過。悔。過。乃。能。改。過。此。顏。子。不。遠。復。之。功。也。或。問。心。曰。無。心。曰。心。可。無。乎。曰。行。其。所。無。事。也。非。無。心。而。何。問。知。曰。無。知。未。達。曰。不。識。不。知。順。帝。之。則。問。如。何。保。任。曰。終。日。乾。乾。口。無。它。言。目。無。它。視。耳。無。它。聞。心。無。它。念。則。天。命。之。性。可。復。矣。教。學。者。首。讀。象。山。陽。明。慈。湖。龍。谿。書。次。及。程。朱。書。關。中。士。子。翕。然。尊。師。之。已。而。母。歿。中。孚。往。襄。城。求。父。遺。尸。將。以。合。葬。不。得。襄。城。知。縣。張。允。中。感。其。義。爲。信。吾。立。祠。常。州。知。府。駱。鍾。麟。嘗。師。事。中。孚。聞。其。在。襄。城。迎。致。之。館。之。道。南。書。院。發。高。顧。遺。書。以。續。東。林。之。脈。繼。講。于。江。陰。于。靖。江。于。宜。興。興。起。者。甚。眾。乃。還。襄。城。以。竣。祠。事。康。熙。十。二。年。陝。西。總。督。鄂。善。以。隱。逸。

薦有

詔起之固辭以疾十七年禮部以眞儒薦大吏親至其家促之起中孚絕粒六日至拔刀自刺大吏駭去得予假治病遂居堊室反局其門謝學者弗與通會

聖祖西巡欲見之不可乃

賜以額曰關中大儒大吏令褒謝中孚草表詞甚拙大吏笑而置之晚遷富平以卒門人王心敬傳其學

二曲集全
謝山集

張考夫名履祥浙江桐鄉人幼孤貧不能就傳受論孟句讀于其母其母詔之曰孔孟只兩家無父兒也既長有志聖道從葢山劉子學嘗書所見以質劉子劉子可之明亡隱居教授與凌渝安沈石長何商隱諸賢切劘講習一以躬行爲務

以爲聖人之于天道庸言之信庸行之謹盡之矣著經正錄
自救曰天之恆道民實秉之存亡顯晦而治亂以分由古準
今百世無忒也故綱常者經世之本父子君臣之道得而國
治猶恆星不愆而五氣順布四時序行也邪慝生于心則禍
亂中于世殆非朝夕之故矣極陰生陽無往不復有開必先
非學不爲功竊取反經之義輯舊聞舉其要約以端其本居
常躬習農事著補農書以爲學者舍稼穡別無治生之道能
稼穡則無求于人而廉恥立知稼穡之艱難則不敢妄取于
人而禮讓興廉恥立禮讓興而世道可以復古矣它所著書
甚只多敦本切于日用病當世名講學者騁口辯沽虛譽故
于來學之士未嘗受其拜一以友道處之康熙十三年卒年

六十四
揚國集祝
所撰傳

朱致一名用純江南崑山人父集璜以諸生貢太學大兵下江東城陷不屈死致一恫焉慕王哀攀柏之義自號曰柏廬隱居味道以諸生老其學確守程朱知行竝進而一以主敬爲程長洲徐昭法與致一爲通家友屢以書問學答之曰竊觀吾兄酬應人倫微喜諧謔諧謔雖無損大節要非君子所宜爲何者書云德盛不狎侮身狎侮其職不修心狎侮其體不立孔子曰修己以敬己非外人物而爲孤子之己修亦非外人物而爲偏寂之修故一修己而人安百姓安矣若視它人一分可忽便是自己一分學力未到蓋聖賢實見人之與我此心同此理同吾無可驕于彼彼無可爲吾所忽者夫婦

之愚不肖。可以與知與能。及其至也。雖聖人亦有所不知。不能。夫又何可忽乎哉。夫又何可忽乎哉。狎侮之心。畢竟起于忽。人忽人之心。畢竟起于不自修。未見自修之至。而猶恐忽人者也。此溫恭克讓。所以爲堯之德。溫恭允塞。所以爲舜之德也。昭法又言。先須發悟。而後可以言學。致一曰。聖賢之道。不離乎事事物物。卽事事物物。而道在。卽事事物物。而學在。苟欲先得乎道。而後言學。則離道與事物。而二之。亦析學與道。而二之矣。朱子曰。人須是博學審問。慎思明辨。篤行。然後可到易簡地位。若先以易簡存心。便入異端。唯卽事物而達簡易之理。故應天下之事。接天下之物。不覺其煩難。若舍事物求簡易。則雖應一事。接一物。便覺煩難。不勝紛錯。聖賢之

學無過一敬。敬猶長隄。巨防滴水不漏。敬之至也。一敬而天下之理得。天下之能事畢。變通鼓舞。盡利盡神。希聖希天之學。俱在于是。致一居平。精神寧謐。動止有常。晨起謁家祠。退卽莊誦孝經。數手書其文。教學者置義田。修墓祭。瞻宗族友。夔諸弟。白首無閒。遇事變。斬然不撓。自言識得天理。孰當機立應。如離弦之矢。更不擬議。更不矜張。何思何慮。行所無事。康熙十八年。或欲以博學鴻儒薦。固辭乃免。其後有司欲舉爲鄉飲賓。亦弗應。居家授徒。講學來者必先授以小學。近思錄。繼進之以四子書。每歲孟春。率諸弟子行釋奠先師禮。禮畢。講四子書一章。進止肅恭。誠意激發。興起者甚眾。已又患學者空言無實得。復作輟講語。反躬自責。言多痛切。其論學

未嘗爭持同異。曰：知所當知，爲所當爲，可矣。它非所暇也。二十七年卒，年七十二。前歿之三日，設先人位，彊起拜于堂，曰：吾可告無辜于先人矣。顧弟子曰：學問在性命事業，在忠孝勉之。有愧訥集及大學中庸講義行于世。無子，以弟之子導誠嗣。

懷訥集南

文稟

顧寧人，初名絳，後更名炎武。江南崑山人。明季爲諸生，落落有大志。見國家多事，法度弛，人材壞，則究心一代掌故，攷制度得失，生民利害，與前史旁推互證，而折其中。于六經慨然以激清爲己任。母王氏以貞節旌。南京破，謂寧人曰：吾雖婦人，然已受國恩矣。脫有大故，我則死之。于是寧人方應崑山知縣楊永言之辟，與嘉定吳其沆同里歸莊共起兵。魯王授

兵部司務事敗。永言遁去。其沆歿之寧人與莊僅得免。王氏遂不食以歿。明年唐王以職方郎召。母喪未葬。不行。既葬。更欲從魯王于海上。道梗不得前。有怨家欲害之。乃變衣冠作商賈客。游江浙間。復之舊都。屢哭于孝陵。既歸。有奴畔投里豪。欲上變告。寧人縛而沈之池。僕壻訟之府獄。急出周路澤。溥爲求解于兵備使者。移訊松江。得釋。遂去之山東。墾田長白山下。北抵山海關。還過昌平。謁諸陵。由太原入關中。至榆林。嘗言馬援田疇。皆從塞上立功業。遂墾田于雁門之北。五臺之東。經營既定。以付其門人。復南客淮安。自山東入京師。蔡州黃氏有獄。詞連寧人。寧人赴山東聽勘。頌繫半年。富平李因篤白京師爲告急于有力者。親至歷城解之。獄始白。復

入京師先後五謁思陵。自是往還河北諸關塞者且十年。最後至陝之寧陰。謂秦人慕經學重處士。持清議。它方所不及。而寧陰據關河之口。足不出戶而能徧閱天下之人。聞天下之事。遂定居置田五十畝以自食。而東西開墾所入別儲以備事。其出游以二馬二騾載書自隨。所至阨塞卽老兵退卒詢其曲折。發書勘驗同異。著肇域攷。天下郡國利病書。其經世之略見于所爲日知錄中。寧人論治綜核名實于禮教尤兢兢。謂風俗衰廉恥之防潰由無禮以維之。常欲以古制率天下。故其辨析名物窮原竟委切渼不苟爲夸大之言。居寧陰時年且老。旣屢嬰患難志氣彌厲。

聖祖朝開博學鴻儒科又

詔修明史公卿累欲薦起之卒不應康熙十九年卒于粵陰年六十九無子門人以其喪歸葬昆山吳江潘耒敘其遺書

行于世

亭林集全
謝山集

謝秋水名文海江西南豐人明季補諸生見天下方亂慨然有出世志入廣昌之香山閱佛書與衲子游處後遂棄諸生學禪益力好大慧禪師書一日午坐忽如鳥飛出籠游太虛中自此神氣洒然異于常時旣讀龍谿王氏書服之復讀陽明子書自信益篤遂與諸友講陽明之學頃之會于新城之神童峯有王聖瑞者力攻陽明秋水與爭辯累日爲所動取羅整庵困知記讀之始一意程朱闢程山學舍于城西名其堂曰尊雒著大學中庸切己錄及講義數十篇以爲爲學之

要畏天命一言盡之矣。聖人一生戰兢惕厲曰：顧諟天之明命。曰：上帝臨汝。無貳爾心。曰：昊天曰明，及爾出王。昊天曰旦，及爾游衍，無非畏天命之心。法學者常當提持此語，注目而視，唯此傾耳而聽，唯此稍有一念之私，急須當下提醒痛悔，刻責速自洗滌，以無犯帝天之怒。工夫既久，人欲淨盡，上下同流，樂天境地可得而臻也。時寧都易堂九子星子、髻山七子俱以文章節槩名天下，而秋水獨反己闇修，務求自得。髻山宋之盛，過訪秋水，遂約易堂、魏禧、彭任、會程山講學旬餘。于是諸子皆推讓程山，謂其篤躬行識道本。康熙二十年有疾，自爲墓志，卒年六十七。

程山講義
自撰墓志

劉崑石，名原淥，山東安邱人也。崇禎末，盜賊蠭起，崑石與其

仲兄率鄉人壘而守賊薄壘鄉人多被創歟仲兄身中九矢
鬪益力。崑石從之發數十矢。矢盡仲兄麾之去。崑石大呼曰。
離兄一步非死所。卒斬首二。獲馬六。賊遁。一鄉得全。亂定。經
營土疆。力耕致富。已而盡推膏腴與仲兄。分其餘爲長兄立
後。瞻其亾姊家。閉關讀書。閱養生家言。喜之。從道士求其術。
寢食俱廢。至得咯血疾。旣而讀宋儒語錄。乃篤信朱子之學。
爲木主。祀朱子于家。集朱子書作續近思錄。自敘以爲始去
物而見身。繼去身而見心。又去心而見理。又言學者居敬窮
理二者皆法文王而已矣。小心翼翼。昭事上帝。居敬之功也。
不識不知。順帝之則。窮理之功也。每五更起。謁祠堂。退居一
室。與諸弟子講論。率常至夜分。月爲講會興起者甚眾。後請

于有司。建朱子祠于東郊。春秋祀焉。以喪祭禮廢。俗日偷。乃斟酌古今。定爲品式。祭必嚴齋戒。蒞事必虔。仲兄有疾。籲天祈以身代。兄歿。七日中止三食。久之。一邑皆化于禮。又爲鄉人置義倉。煮粥以食飢人。嘗曰。人與我一天而已。何畛域之有。焉。年八十二。有疾。當祭朱子。彊起拜于庭。悶絕良久。甦。康

熙三十九年卒。

讀書日記陳舜錫所撰墓志馬長淑所撰傳

徐昭法。名枋。江南長洲人。父汧。爲明少詹事。明亡。沈水步。昭法少舉于鄉。旣遭變。遂遁迹山中。居靈巖之上。沙布衣。艸履終身。不入城市。時上靈巖謁。繼起禪師問佛法。家貧。往往絕糧。繼起饋之粟。受之。非繼起弗受也。湯文正爲巡撫。屏騶從訪之。不得見。衰稊歎息而去。晚歲志道益篤。宣城沈麟生詒

之書。頌其志節之美。復書曰。縉袍不恥。是道何臧。學問之幾。不舍一息。區區陳迹。猶然見誦。吾滋懼矣。昭法。歿孤孫方幼。不克葬。故人戴冠。自山陰來。賣字吳門。每紙得百錢。積二年。乃葬昭法于青芝山下。

居易堂集
蘇州府志

劉伯繩。名洵。浙江山陰人。琅山劉子之子也。方劉子家居講學。諸弟子聞教未逮。輒私于伯繩。伯繩應幾開譬。具有條理。聞者莫不灑然共相欽服。及劉子絕食歿。唐魯二王皆遣使致祭。蔭伯繩官。伯繩辭曰。敢因父歿爲利。旣葬。遂杜門絕人事。有司或請見。卽通家故舊。亦峻拒之。副使王爾祿故劉子門生。以金三百兩請刻公遺書。弗受。語使者曰。幸爲我辭。大。夫出處殊涂。無苦相彊。居戢山一小樓二十年。攷訂遺經。以。

竟先人之業。所與接唯史子虛張奐。夫憚仲升數輩而已。或勸之舉講會。亦不應。臨終戒其子曰。若等當常記憶大父遺訓。安貧讀書。守人譜。以終身足矣。人譜者。郭子所著書也。所臥榻假之。祁氏病亟。彊起易之曰。豈可終于祁氏之榻。旣歿。門人私諡曰貞孝先生。

思復堂集全謝山集

汪魏美名。潁浙江錢唐人。與人落落寡諧。人號曰汪冷。明年舉鄉試。知府錢君以女妻之。初盛飾入門。魏美誠之。乃屏服御。卻侍婢。以疏布親操作。明亡。魏美遂棄科舉。姻黨欲彊之試禮部。出千金視其妻曰。能勸夫子駕則畀汝。妻曰。吾夫子不可勸。吾亦不愛此金也。有司或以奉金爲魏美壽。不得卻。埋之。里貴人請墓銘。餽百金。弗許。屏居城外。常手提藥裹往。

來山谷間。宿食無定處。時念母一至家。家人行迹之。不能得也。已而出游東南名山。與畸人高士游。歸而依愚庵。三宜和尚。究出世法。又頗好道士術。能數日不食。寧都魏叔子至杭州。訪之。與爲兄弟交。因問曰。兄事愚庵。謹豈有意爲其弟子耶。魏美曰。吾甚敬愚庵。然今之志士。多爲釋氏牽去。削髮被僧服。吾儒之室。虛無人。此吾所以不肖也。病肺五月餘。一日晨起視日。曰可矣。命子蓮具紙筆。書五言詩一章。投筆就寢而逝。詩曰。大化無停軌。道術久殊轍。住世守頑形。問涂猶未徹。至人本神運。可會不可說。冰泮水還清。雲開月方潔。一旦破樊籠。逍遙從此別。魏叔子集

應嗣寅。名撫謙。浙江仁和人。早歲厲志節。與其友虞峻民張

伏生蔣與恆諸賢爲獵社。康熙十七年以博學鴻儒徵。嗣寅
備疾與牀。詣有司以請得毋行。海寧知縣許西山請主書院。
造廬者再。不見。旣而曰。是非君子中庸之道也。乃汎舟往謁。
許大喜曰。應先生其許我乎。嗣寅遂巡對曰。令君學道。但從
事于愛人足矣。彼口說者。徒長客氣耳。許默然不怡。旣出。嗣
寅解纜疾行。其弟子曰。令君已戒車騎行。且至。何亟也。嗣寅
笑曰。令君好事。必有束帛之將。拒之則益其慍。受之則非心
所安也。行矣。莫遲遲也。同里姜圖南以御史巡鹺歸。再致饋
于嗣寅。弗受。一日遇于涂。方盛暑。嗣寅衣木棉衣。顚顚踟躕。
圖南歸以葛二端遺之。且曰。此非盜蹠物也。幸勿拒。嗣寅曰。
吾昨偶中寒。篋中絺衣故在。不需此也。竟還之。居常攷索遺

經以反躬實踐爲學。坐臥小樓。一筵一席。罔不整肅。其倦而
休。輒端坐瞑目。起則徐徐而行。終日無疾言。無遽色。遠近來
學者。眾里中一少年。使酒難近。忽叩門求聽講。許之。聽講三
日。甚拘苦。遂去。使酒如故。一日在道中。持刀欲殺人。勢洶洶。
莫能阻。忽有人曰。應先生來。其人遽失色。股戰。棄刃于道。嗣
寅前勞之曰。一朝之忿。何至此。益歸乎。其人俛首謝。過去。嗣
寅所著書甚具。多宗朱子。亦閒出新義。弟子凌印嘉。沈士則。

姚宏任傳其學。

全謝山集

沈朗思。初名蘭。先夏名昀。浙江仁和人。從鼓山劉子學。明亡。
棄諸生。教授里中。膏粱日絕糧。采階前馬蘭艸食之。客或饋
米數斗。不受。其人固請。固辭。朗思餓而慙。方推讓閒。頓于地。

其人皇駭遁去。既而蘇徐起笑曰：「其意可感然，適以困老子耳。」劉子既卒，弟子傳其學者，互有爭辯。朗思曰：「道在躬行，但滕口說，非先生所望于吾曹也。」以喪禮久廢，輯士喪禮說，薈萃先儒之言，定其可行者，授弟子。陸寅疾亟，門人問曰：「先生今日何如？」朗思曰：「心中無一物，知誠敬而已。」既歿，應嗣寅爲經紀其喪，無以斂，涕泣不食。或問之曰：「吾不敢輕受，購襚以辱先生。」嗣寅之徒姚敬恆趨而前曰：「如敬恆者，可以斂先生乎？」嗣寅曰：「子之篤行，乃沈先生所許也，其可矣。」于是敬恆斂朗思葬之于西湖之濱。

全訓
山集

耿介石，名介，河南登封人。性清鯁，篤于踐履。順治八年成進士，選庶吉士，尋授翰林院檢討，出爲福建巡海道。時海疆未

靖築石城以備盜興廉去貪革除苛政恩信大行康熙元年轉江西湖東道改直隸大名道時方嚴旂下逃奴之令行所過輒以窩逃舉之株連動三四十人介石在官期年清三百餘案分別輕重釋諸無辜民甚德之丁母憂歸從蘇門孫徵君游覃思絕學自任益重復嵩陽書院以造士二十五年湯文正公以禮部尚書掌詹事府疏薦介石

召入爲少詹事竝輔導

皇太子會文正爲執政所嫉拮據萬端介石遂引疾乞休詹事等劾介石詐疾因以傾文正尋予假歸仍主嵩陽講學不輟卒于家嘗與文正書以爲道本中庸作不得一些聰明執不得一些意見逞不得一些精采文正以其言爲然惟學

編湯子
遺書

張仲誠名沐河南上蔡人順治十五年成進士出知直隸內黃縣其治以躬行爲本重農桑敦教化裁革苛政與民休息令家書爲善最樂于門注六諭敷言反覆譬曉雖婦人孺子莫不憬然易慮也朔望集諸生會講明倫堂俾自奮于學居五年坐事免復以薦起知四川資縣治資如治內黃一載告歸從夏峯孫徵君游學益邃初湯文正公自夏峯道內黃與仲誠語大說詒書徵君稱其任道甚勇求道甚切及以薦入京文正與人書又稱仲誠腳踏實地其學以主敬爲功治易有心得當代眞儒也尋主游梁書院晚而闡白龜圖以教學者興起者甚眾學者稱爲上蔡夫子云

雜學編湯子遺書

賈敏修名克勤河南柘城人少勤學讀書每過夜中稍長徧治諸經聞耿介石傳蘇門孫徵君學從之嵩陽居五六年入京應禮部試謁湯文正公日夕請業錄其語以自檢文正謂師道不立由教官之失職也勸敏修就教職得泌陽教諭泌陽地小而荒人鮮知學敏修爲立五社設之師各置規過勸善簿月朔稽善過而勸懲之又立童子社授以孝經小學次及四書五經暇則齋居讀書餽粥不繼宴如也康熙十七年成進士選庶吉士丁母憂歸學者踵至于柘城東門外柘朱陽書院倡導正學于時四方學者自嵩陽外獨朱陽爲盛矣服除入京授檢討

聖祖命諸翰林作楷書敏修書學宗孔孟治法堯舜而其要

在慎獨

聖祖器之尋以父老乞歸日與朱陽學者優游講習溫故知
新反躬自得立家規著孝經闡義事親庸言多切于內行居
頃之方侍父食氣逆上危坐而逝年六十四

維學編
望谿集

潘克先名恬如江南長洲諸生也其學切于內省聲光闇然
以師道推重鄉里與南昀先生及尤展成爲友康熙三十
五年年八十以疾終先一日致書展成曰病甚弗起矣生吾
順歿吾寧到此覺眞實受用也南昀先生聞而歎曰潘先
生其知命者乎爲作誄曰鄒魯堂空雒閩路塞功利漸濡聲
華炫溢儒行積靡師道蕩軼黨庠術序末由矜式猗歟先生
風規挺出有睟其容弗漓其質敬以束躬誠以畜德方言矩

行宮牆羽翼鉞鐔韜光時不見識邈也無悶困也勿恤弟子
受詔威儀秩秩几席無聲步趨有則循序致精辨疑解惑經
師人師庶幾允克旣享遐齡彌徵恂慄子處無營窮鄉壤壁
芒屨苧袍水飲蔬食天君泰然素位自得示我德隅歌詩之
抑惜未著畫輝皇卷帙獨有微言聞自疾革生順歿寧大事
已畢告終親朋馳箋絕筆西銘仁體誰其窺測承是提撕契
余淵密如撥雲霧方臨杲日灰生之故晝夜消息童耄淪胥
歲月浪失聲銷影謝神明奔逸唯聞道者性天協一乘化俱
盡不震不怵游于太虛反于無極烏呼敝衾而斂適于袞飾
淺壤而葬安于隧域不染世榮不遺身貳先生令名于今罕

匹吾作誄詞敢告副墨

南酌
文彙

吳徽仲名慎江南歙縣諸生也于書無所不讀而尤盡心于孔曾思孟宋五子著書三十餘種其行世者有周易粹言大學中庸章句翼論學以敬為主故號曰敬庵初游梁谿于時主東林書院者爲高先生彙旃先生名世泰忠憲公從子恪守家法化導不倦徽仲與其州人汪文儀施虹玉無錫張秋紹等同受業高先生春秋釋奠畢升堂卽席以次開講威儀儼然見者莫不斂容傾聽也已而歸歙會講紫陽還古兩書院興起者甚眾老子家文儀名燧居徽之金城里年十六卽手錄先儒書朝夕觀省旣長篤于躬行一言一動必秉成法所著書甚具一以雒閩爲宗其讀易質疑尤見推于時卒年七十四虹玉名璜休寧人初爲舉業詣府應試入紫陽書院

聞鄉先生講學瞿然曰學者當如是矣遂棄舉業發憤自力于躬行己兩書院會講皆推虹玉虹玉先一日肅齋戒至期攝衣登座務設誠以感人教學者九容養外九思養內以造于誠學者翕然宗之己而游梁谿事高先生將歸與高先生期某年月日當赴講及期高先生設榻以待或曰千里之期能必信乎高先生曰施生篤行君子也如不信者吾不復交天下士矣言未既虹玉挈其子僮囊至矣著思誠錄小學近思錄發明行于世秋紹名夏隱居菰川之上孝友力學初受業于馬文肅之門己而入東林書院其爲學先經後史博覽彊記而歸本自治高先生既歿竝推秋紹主講席湯文正爲巡撫至東林與秋紹論學躋之邀至蘇州學宮講孝經小學

退而著孝經解義小學滄注又攷先儒遺書著雜問原流錄

卒年八十餘

東林書院志

高紫超名愈江南無錫人忠憲公之兄孫也十歲讀忠憲遺書卽有向學之志既壯補諸生平居不事帖括日誦遺經及先儒語錄謹言行嚴取舍之辨嘗曰士求自立須自不怠溝壑始事親孝父晉侯嗜酒食必具酒肉出就人飲每遣童往候而已屏立路旁俟與主人別則趨而掖以歸以爲常先後居父母喪不飲酒食肉不內寢有兩兄皆前歿撫其孤男女爲之昏嫁初有田數十畝所入錢輒隨手盡晚年遂大困嘗餒粥七日矣方挈其子登城上眺望充然樂也儀封張清恪爲巡撫檄有司延紫超主東林講會紫超以瘍疾不行有司

饋之人。莫不受平居體安氣和。雖子弟未嘗訶譙。終日凝坐。不欠伸。當盛暑。不裸跣。與人食。不越簋下箸。有忿爭者。至紫超前。輒愧悔。縣中人好以道學相詆譏。獨于紫超。僉曰。君子。君子云。年七十八卒。嘗注周禮及朱子小學。乾隆中。督學尹公以小學取士。頒行其書。

東林書院志

顧昀。滋名培。江南無錫人。少善病。母憂其不壽。命棄舉子業。習長生家言。事導引。頗得其術。年二十五。從空輿湯之。綺問學。幡然悔曰。道在人倫庶物而已。乃吾向者之自私也。甚哉。之。綺歿。有弟子曰金敞。昀滋築其學山居。以延敞。晨夕講習。遵高子靜坐法。以整齊嚴肅爲入德之方。默識未發之中。久之。遂篤信性善之旨。動靜語默。無非學矣。晚歲。四方來學者。

日眾春秋大會山居行復七規有請益者教以默識其大原
實體諸倫物七日期畢釋奠于先師習禮歌詩歲以爲常張
清恪撫吳時詣東林講學頗疑靜坐之說昀滋往復千言暢
高子之旨其言甚辯清恪不能難也年七十九卒

華希閔所撰傳

錢子仁名民江南嘉定人早孤年十三棄書學賈既長數爲
鄉里所侮慨然曰世多妄人求其不妄者唯聖人乎聞青浦
有孔子衣冠墓齋戒往禱願爲聖人之徒其夕夢一丈夫引
而告之曰道之不明由後儒之說亂之也子欲爲學屏去漢
以後書其可旣歸始取四子書讀之時年已三十矣題所居
曰存養廬宴坐其中反觀默識日有省發陸清獻公知嘉定
子仁從之論學又五年復往平湖見之清獻與之語多不合

怪問其所由。子仁曰。公從朱子入。民從尼父入耳。嘗與友人書曰。先聖之學。貴乎本末兼盡。始終有序。大學所謂知本者。作聖之基也。誠正者。作聖之功也。中庸所謂尊德性。先也。本也。道問學。後也。末也。卽物窮理。其病在于無本。六經注我。其誤在于無末。論語曰。君子務本。本立而道生。朱子以爲學者不可厭末求本。教人但學其末。是所謂其本亂矣。本亂而求末之治。豈可得乎。此未合乎大學也。孟子曰。堯舜之知不徧物。中庸曰。雖聖人亦有所不知焉。朱子教初學者。卽責以知既盡而後意可誠。又云。格物者。窮事物之理。致知者。知事事物物之理。如此則意之惑亂滋甚。又安可得而誠乎。且堯舜之知不能徧物。況初學乎。此未合乎孟子也。又言今之

學者不知追求孔孟之實而紛紛焉爭朱陸之異同是謂舍己田而芸人之田終亦必亾而已矣其篤于自信如此子仁卒于康熙中其遺言罕有聞者後七十餘年族子大昕爲之狀摺紳開始有傳其學者焉

錢大昕所撰狀

勞麟書名史浙江餘姚人世爲農麟書少就傳讀書長而躬耕以養父母夜則披卷莊誦年十七讀朱子大學中庸序慨然發憤以道自任舉動纖悉必依于禮購朱子近思錄讀數番立起設香案北面稽首曰吾師在是矣恆自刻責以爲天之命我者若君之詔臣父之詔子一廢職卽鴈嚴譴一墜家業卽窮無所歸可不慎哉讀易啟蒙本義及橫圖圓圖有疑不能晰輒仰天籲朱子曰子其牖我乎研慮旣久觸處洞然

其論學以爲下學之功。始于不妄語。不妄動。極之至誠。無歇手處。引接後學。委曲盡誠。傭工下隸。皆引之向道。曰。盡汝職分。務實做去。終身不懈。聖賢矣。勿自薄也。聞者莫不爽然。里中販賣者。近麟書居。不忍貨僞物。芻兒牧童。或折棄繒繳。毀機穽。有鬪爭者。就麟書質。往往置酒求解。門人桑調元自錢唐來謁。論學數日。將別送之。曰。吾壽不過三年。恐不復相見行矣。勉之。居三年。麟書年五十九。其九月。語門人汪鑒曰。不過今月。吾將去矣。遂徧詣親友家。飯與老者言。所以教與少者言。所以學已而令家人治木。飭喪事。一遵朱子家禮。晦前一夕。趣具湯沐浴更衣。移牀正寢。蒔燭宴坐。如平時。旋就寢。明晨聞喉中有聲。撫之逝矣。麟書嘗言。文王陟降。在帝左右。

此是實理。溪山窟谷中有真儒者出。縱逐世不見知其神明。亦必在孔子左右無疑也。一夕調元夢麟書從一大殿出。執其手言曰。汝稭子。踽踽欲適萬里。程吾何能釋懷。調元驚寤。後十年入太學。瞻大成殿如夢所見。調元字伊佐。雍正中進士官工部主事。引疾歸。爲人清鯁絕俗。足迹徧五岳。晚年主樂原講席。益暢師說。刻餘山遺書。麟書所著也。鑒亦餘姚人。嘗以父喪自雲南歸。至漢川。遇大風。舟且覆。鑒馮棺號哭。誓以身殉。忽風回。得泊沙岸。乃免。眾呼爲汪孝子。爲人矜尚志節。旣從麟書學。麟書戒之曰。英氣客氣也。其學以鎔之。麟書之歿。鑒實左右焉。麟書二子。長廷斌。能食貧。居喪不受賻贈。後麟書七年卒。文徵甫

朱湘陶名澤。雲江南寶應人。早歲勤學。得程氏分年日程。卽依次讀之。閱數年而略徧。更博覽天文輿地諸書。窮竟原委。久之。始有志于聖人之道。讀朱子語錄。反覆不厭。數有心得。嘗言。世之名朱學者。其居敬也。徒矜持于言貌。而所爲不覩。不聞者。離矣。其窮理也。徒汎濫于名物。而所爲無方。無體者。昧矣。于是有舍德性而言問學。以爲朱學固如是者。不知從來道問學。莫如朱子。尊德性亦莫如朱子。觀朱子中和之說。其于中庸之旨。渙乎。故知居敬窮理。只是一事。窮卽窮其所存之心。存卽存其所窮之理。初非有二也。平居齋肅如對神明。遇喪祭一以朱子家禮爲法。雍正六年。

詔公卿各舉所知。直隸總督劉師恕欲薦湘陶。命其弟造廬。

請弗應。晚歲得脾疾，每五更起，盥沐觀書，至夜分乃息。謂其子曰：「聖賢工夫，正于困苦時驗之。若稍稍放倒，便至墮落，可不懼哉！」疾甚，吟邵子詩曰：「任經生死心無異，雖隔江湖路不逃。」命家人治後事，別諸親友，怡然而逝。年六十七。止泉集王箴傳所撰

向荆山，名璿，浙江山陰人。少攻舉子業，年二十餘，居母喪，始觀性理書。一日讀孟子云：「人之所以異于禽獸者，幾希。」瞿然曰：「吾其遂甘爲禽獸乎？」切已悔過，心不寧者數月。王行九者，王文成公裔也，方講致良知之學，荆山往而請業，聞其言，輒心開去，而以書往復者數四，益自信，遂奮力于學。聚里中十餘人爲輔仁會，每月朔一舉，威儀進止，咸有法度。居久之，里

人皆以癡目之。荆山聞而笑曰：「其然乎？其然乎？」作癡人傳。辭曰：「浙江之濱有人焉，問其姓氏，不荅。觀其行，大類癡者。人遂共以癡呼之。其平居也，首不脫冠，身不去衣，立未嘗跛，坐未嘗箕，行無緩急，翼如其趨，自手至足，繩尺是拘。當世所尚曰：『唯洒脫。』視此所爲，癡復何說？每直無事，危坐終日，或誦詩書，或玩周易，思而未得，如負重疾，迨乎旣得，不勝悅懌，忽憂忽喜，循環莫息。在傍觀者，莫測其由，指之爲癡。更復何尤？及與物接，互相談論，或雄其辯，動人聽聞，或俯其首，寂無所云，言或非禮，拒而弗荅，道或不同，厲聲正色，時尚圓巧，彼獨方拙。癡之一言，非此安設？情之所發，多與世忤，人之所爭，彼乃弗顧。人之所欣，彼或加怒，是非當前，一衷以理，毀譽及躬，弗悲。」

以喜見義勇爲奮不自止。聲色貨利脫然如洗。與物無競。與世無爭。苟非癡人。復誰其能。生質之陋。幾于下愚。人皆了了。彼則若逃。妄效聖賢望焉。以趨堯舜之中。孔顏之樂。太極圖。圖。先天心學。汲汲孜孜。窮揆力索。上希鄒魯。下師濂雒。言俾古昔動法。先王惡聞人過。樂道人長。凡此所爲。癡入肺腸。烏呼。天地有此癡氣。聚而成人。爲世所異。自古及今。繩繩相繼。後有來者。幸無自棄。荆山服膺王學者。且六七年。已讀程朱書。忽自疑。偶于肆中得高忠憲公年譜。讀之。遂舍其所學。一以程朱爲宗。確守小學近思錄章句集注諸書。與其學者辨析異同。反覆不倦。其自省亦日密。嘗言事事反躬。刻刻畏天。一刻不畏天。便是臯過一事。不反躬。便涉怨尤。故其平居雖

小過失刻責。甚至日之所作。夜必告天。家貧或終日不舉火。而手不釋書。著志學錄。明其所得于程朱者。雍正九年卒。門人黃序言。程魯望傳其學。序言名良輔。魯望名登泰。與荆山同鄉里。聞其論學有省。遂受業焉。始宗王學。已卒歸于程朱。序言能文章。善聞其師說。魯望以侍父病。得咯血疾。疾亟。讀書不輟。或止之。則曰。死命耳。以學。死不愈于徒死乎。卒時年二十九。序言後荆山一年卒。志學錄

鄧慕濂。名元昌。江西贛人也。爲諸生有文名。年二十五得宋五子書。讀之涕泗被面下。曰。吾乃今日知爲人之道也。出入禽門。往竟不自知何哉。遂屏棄制舉業。朔望陳五經及宋儒書。拜之。每晨起跪讀通書太極圖說西銘三四徧乃起靜坐。

零都宋昌圖以通家子謁之慕濂喜曰吾小友也館昌圖于家晨夕論學爲日程言動必記之互相攷一日昌圖讀朱子或問首章慕濂過廊廡下聞之泣而拜慟不能起其子見之趨翼焉慕濂與昌圖相持而啼謂昌圖曰子年未二十負志趨願子勉卒之無蹈吾所悔永爲朱子學人偷息天地慕濂有長兄瞽而頑大小事必稟而後行後母性瑣刻每怒慕濂慕濂必長跪請學必得解乃已後母弟早夭弟婦有子請于慕濂曰感伯之德願畱守待兒之有立也慕濂泣拜之自是遂不入處室挾其子與弟之子寢于堂課督之慕濂有田在城南秋孰視穫挾小學書坐城隅見貧人子拾秉穗者累累慕濂招之曰來女無然近吾吾教女讀書能背誦書者吾自

量穀與女羣兒爭昵趨之慕濂始則使識字既使諷章句既以俚語譬曉之羣兒咸踊躍得善既卒穫羣兒嗥曰穫卒先生且歸奈何有泣者自是秋穫羣兒則就學焉以爲常故城南人無少長智愚皆曰我鄧先生城南人見有衣冠問鄧先生者則曰是我先生客邪渴則進飲飢則進食市井閒見慕濂必肅立端拱俟其過乃敢列坐云乾隆三十年卒年六十餘

羅有高述

姜雲一名國霖山東濰縣人少有至性父游京師疾病雲一往省則已歿無錢市棺以敝衣一稱裹父尸身負之乞食而還族黨爲醵金以葬母善怒怒則致疾雲一百計解之一日怒甚雲一跪前作小兒嬉戲狀持母手撻其面母笑而罷

自是不復怒。雲一時年五十矣。師事昌樂周士宏。士宏有高致。嘗與雲一至。莒樂其山川家焉。歿而葬焉。雲一築室其側。年饑。率二日一食。莒人恐其餓歿。聞于官。而遺之粟。居常肅衣冠。謹言語。遇人必忠敬。人或非毀之。至面誚。夷然不爲動。昌樂閻懷庭問雲。一喜讀何書。曰。論語。終身味之不盡也。其自述生平學力。年四十始能不以貧富撓其心。五十始能不以歿生動其心。懷庭爲姜先生言行記如此云。閻懷庭集

閻懷庭名循觀。山東昌樂人。性穎敏。讀書過目不忘。年十八。舉于鄉。其學初好佛氏。旣讀宋儒書。乃一奉程朱爲宗。省身克己。唯日不足治。經不主一家言。而要本于自得。少而孤。及長。母承祭哀慕累日。其父母墓卑淫。直淫霖。眾水交匯。每當

夏秋交天將雨輒不食繞墓哭以是致羸疾議從墓旁濬渠洩其流數年而事不集久之卒遷葬焉益都李文藻之言曰當懷庭之遷葬也甫啟壙時恐水之敗其親之棺也恐敗其棺遂及其親之體膚也窅窅乎其若欲以生殉親也若欲以身代親之體膚也既見棺無恙依依乎若親之再生也若孺慕乎其側也及遷葬封穴皇皇乎如弗克見也如親之初歿也一二戚友持掖之始克終事焉乾隆三十四年成進士授考功主事當官議事務持大體嚴功臯意所不可持之甚力衙中會食率用四五簋懷庭獨自買麪餅食之一同年友爲外官遺之金不受曰忝居議吏之地何敢辱君惠且不可以貧故累君也居二年引疾告歸歸一月而卒年四十五有西

淵文集及尚書春秋說行乎世

閻懷庭集李文藻述
韓夢周所撰墓志

論曰予觀近世諸先生論學書其閒是非離合蓋難言之然
攷其出處之際作止進退之閒其冥合乎道者多矣于是比
次諸先生行事擇其言之醇者著于篇至我高大父曾
大父闢修力學希迹東林其生平行事別有述俟論定于後
之君子焉

四月十九日 止莊

二林居集卷十九

終